

Supervizor za Brčko obustavila usvajanje novih regulacionih planova u Brčko Distriktu

Supervizor za Brčko, Susan Johnson, je danas izdala Nalog o obustavljanju aktivnosti na izradi i usvajanju novih regulacionih planova za urbane dijelove Brčkog dok Skupština Brčko Distrikta ne usvoji odgovarajuće izmjene i dopune Urbanističkog plana za Brčko, Brčko Distrikt BiH.

Supervizor je naglasila i zakonsku i praktičnu potrebu za Prostornim i Urbanističkim planom, kao dugoročnim strateškim planskim dokumentima koji će predstavljati osnovu i uslove na osnovu kojih se mogu raditi regulacioni planovi. Praksa improviziranja parcijalnih zamjena za regulacione planove i kompletnih regulacionih planova na *ad hoc* osnovi, po svemu sudeći započeta prije nekoliko godina, štetno utiče na zakonit proces prostornog, urbanističkog i regulacionog planiranja i nije uvijek u najboljem interesu građana.

Sve redovne aktivnosti na implementaciji već usvojenih regulacionih planova se mogu nastaviti u skladu sa odgovarajućim propisima. Supervizor može odobriti usvajanje planskih dokumenata u slučaju neosporne potrebe iz ekonomskih, finansijskih, socijalnih ili bezbjedonosnih razloga. U tim slučajevima, gradonačelnik Distrikta će prethodno, pismenim putem, zatražiti supervizorovo odobrenje, obrazlažući tu potrebu.

Ubuduće svi novi regulacioni planovi moraju biti u skladu sa usvojenim Urbanističkim planom i ne mogu sadržavati elemente koji nisu usklađeni sa važećim urbanističkim planom.